

Bosna i Hercegovina
Federacija Bosne i Hercegovine
TUZLANSKI KANTON

KANTONALNI SUD U TUZLI

Broj: 003-0-Su-25-000 298

Datum, 14. juli 2025. godine

**STATISTIČKI IZVJEŠTAJ O POŠTIVANJU OPTIMALNIH I PREDVIDIVIH ROKOVA
U PERIODU OD 01.01.2025. GODINE DO 30.06.2025. GODINE**

U skladu sa Članom 15. stav 1. Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini, a shodno Odluci o predvidivim rokovima Kantonalnog suda u Tuzli, dostavljamo Vam statistički izvještaj o poštivanju optimalnih i predvidivih rokova za prvih šest mjeseci 2025. godine.

Analiza pokazatelja iz statističkog izvještaja o poštivanju optimalnih i predvidivih rokova:

Statistički izvještaj o poštivanju optimalnih i predvidivih rokova iz CMS-a dostavlja se u prilogu obzirom da je isti u Pdf formatu,

Analizom navedenih pokazatelja konstatovano je da je do prekoračenja predvidivih rokova došlo na drugostepenom parničnom i privrednom referatu, drugostepenom referatu odlučivanja po žalbi u zemljišno – knjižnim predmetima, referatu odlučivanja o ponavljanju postupka u građanskim stvarima, drugostepenom i prvostepenom krivičnom referatu, ali to prekoračenje nije bilo u značajnom broju dana, sem na drugostepenom parničnom referatu, gdje su predmeti završeni sa prekoračenjem predvidivog roka od 496 dana.

U Kantonalnom sudu u Tuzli od 01.01.2025. godine na svim referatima bilo je ukupno neriješenih 2.819 predmeta. U izvještajnom periodu, za prvih 6 mjeseci primljeno je na svim referatima 2.037 predmet, tako da je ukupno u radu bilo 4.856 predmeta, što znači da su sve sudije u ovom periodu bile radno angažovane svaki bi sudija u prosjeku bio zadužen sa 168 predmeta, što je značajno manje u odnosu na prošlu godinu. Zbog odsustva sudija usljed bolovanja i odlaska sudija u penziju, nije bilo moguće smanjiti broj predmeta kako je sud planirao, ali ćemo to nastojati u narednom periodu. U prvih šest mjeseci 2025. godine na svim referatima riješeno je 2.558 predmeta i od tog broja u optimalnom roku riješeno je 1.143 predmeta, u predvidivom roku 1.895 predmeta i sa prekoračenjem predvidivog roka u 663 predmeta, od čega je u 496 drugostepenih parničnih predmeta, 31 drugostepeni privredni predmet, 25 vanparničnih predmeta, 47 drugostepenih krivičnih predmeta, 51 drugostepeni predmet odlučivanja po žalbi u zemljišno – knjižnim predmetima i neznatnog prekoračenja od jednog do sedam dana u prvostepenim krivičnim predmetima i predmetima ponavljanja postupka u građanskim stvarima.

Najveće prekoračenje predvidivog roka bilo je na drugostepenom privrednom referatu od 496 dana i značajno manje na referatu odlučivanja po žalbi u zemljišno – knjižnim predmetima od 51 dan, drugostepenim privrednim predmetima 31 dan i drugostepenim krivičnim predmetima od 47 dana, ali ni to prekoračenje nije značajno veliko u odnosu na prethodnu godinu.

Do ovog prekoračenja došlo je zbog odsustva sudija usljed bolovanja i opterećenja sudija koji su zaduženi predmetima na drugostepenom građanskom referatu u prosjeku sa oko 100 predmeta, što predstavlja normu od sedam mjeseci, bez priliva novih predmeta i objektivno se ne mogu ispoštovati predvidivi rokovi koji su u odnosu na prethodnu godinu značajno smanjeni. Na drugostepeni građanski referat raspoređeno je 23 sudija, jedan sudija se nalazi na bolovanju od 2024. godine, a drugi sudija je na bolovanju od mjeseca maja 2025. godine, dok je troje sudija na ovom referatu otišlo u penziju, tako da na drugostepenom građanskom referatu trenutno nedostaje pet sudija, te je njihov broj predmeta prenesen u rad na druge sudije, obzirom da se predmeti moraju rješavati po starosti inicijalnog akta kojim je postupak pokrenut pred općinskim sudom i starosti inicijalnog akta kojim je postupak pokrenut pred Kantonalnim sudom u Tuzli.

Na prvostepenom krivičnom referatu došlo je do prekoračenja predvidivog roka u 7 prvostepenih krivičnih predmeta, jer se radi o predmetima koji su složeni i u kojima krivični postupak zbog složenog dokaznog postupka traje duži vremenski period. U jednom broju ovih krivičnih predmeta, predmeti se zbog procesnih razloga ne mogu staviti u rad, jer su optužena lica nedostupna i protiv njih su raspisane potjernice. Prije svega radi se o dva predmeta ratnih zločina koji su zbog nedostupnosti optuženih lica blokirani i ne mogu se raditi, kao i u 11 ostalih krivičnih predmeta u kojima su osumnjičena, odnosno optužena lica nedostupna.

Na ovom referatu trenutno radi 5 sudija, a prioritet u radu imaju predmeti organizovanog kriminala i korupcije, te se ovi predmeti, ukoliko postoje procesne pretpostavke trebaju uzimati kontinuirano u rad i u tim predmetima zakazivati glavne pretrese i nastavke pretresa u što kraćim rokovima.

Na drugostepenom krivičnom referatu u 47 riješenih predmeta došlo je do prekoračenja predvidivog roka, a riješeno je ukupno 175 predmeta u ovom izvještajnom periodu, od čega 128 u predvidivom roku, a 59 predmeta u optimalnom roku i 47 predmeta sa prekoračenjem predvidivog roka.

Na drugostepenom prekršajnom referatu riješeno je ukupno 160 predmeta, od čega u optimalnom roku 159 i u predvidivom 160, a nije bilo na ovom referatu predmeta koji su riješeni sa prekoračenjem predvidivog roka. Prekršajne predmete trenutno radi dvoje sudija i ovaj referat je izuzetno ažuran.

U ostalim vrstama postupka i to u zemljišno – knjižnim predmetima, od ukupno završenih 106 predmeta, 29 je riješeno u optimalnom roku, 55 predmeta u predvidivom roku i 51 predmet sa prekoračenjem predvidivog roka. Također, od 19 završenih prvostepenih krivičnih predmeta 4 predmeta je završeno u optimalnom roku, 12 predmeta u predvidivom roku i 7 predmeta sa prekoračenjem predvidivog roka. Na referatu upravnog spora završeno je 146 predmeta, od čega 33 predmeta u optimalnom roku i 146 predmeta u predvidivom roku, a nije bilo predmeta koji su bili završeni sa prekoračenjem predvidivog roka. U vanparničnom postupku završeno je 250 predmeta i to 145 predmeta u optimalnom roku, 225 predmeta u predvidivom roku i 25 predmeta sa prekoračenjem predvidivog roka.

Broj neriješenih predmeta na kraju izvještajnog perioda je 2.298 predmeta, što znači da se značajno smanjio broj neriješenih predmeta za 521 predmet u odnosu na početak godine i to iz razloga jer se smanjuje broj predmeta u sudu, a više sudija radi na referatima, iako je sud u ovom periodu radio bez dvoje sudija koji su na bolovanju i troje sudija koji su otišli u penziju u 2025. godini, a četvrti sudija je otišao u penziju u mjesecu novembru 2024. godine. Prosječno trajanje riješenih predmeta iznosi 267 dana, a prosječno trajanje neriješenih predmeta iznosi 224 dana, što predstavlja značajno smanjenje u odnosu na prethodnu godinu.

Problem predvidivih rokova ne bi bio toliko izražen da sudije rade samo zaostale neriješene predmete koji su određeni Odlukom o predvidivim rokovima sa danom 01. januar 2025. godine, ali

problem postoji jer se predmeti u ovom sudu rješavaju prema Planu rješavanja predmeta, te ukoliko je predmet star i došao na rješavanje po žalbi u ovaj sud, uzima se odmah u rad, pa stoga postoji nesklad između Plana rješavanja predmeta i Odluke o predvidivim rokovima prema kojoj se predmeti trebaju uzimati u rad prema starosti inicijalnog akta kojim je pokrenut postupak pred općinskim sudom i pred ovim sudom.

Analiza raspoloživih resursa u sudu:

Kantonalni sud u Tuzli pokriva područje 8 općinskih sudova i obzirom na broj sudija i stručnih saradnika u tim sudovima i predmete koji dolaze na rješavanje po žalbi u ovaj sud nije moguće rješavati u predvidivim rokovima, jer i općinski sudovi rješavaju najstarije predmete u kojima inicijalni akt potiče iz starijih godina i predmete sa inicijalnim aktom koji je iz novijeg vremenskog perioda. Prilikom dolaska predmeta na odlučivanje po žalbi, Kantonalni sud u Tuzli vodi računa da se predmeti uzimaju u rad prema starosti inicijalnog akta, tako da se najstariji predmeti uzimaju u rad prije predmeta u kojima je inicijalni akt novijeg datuma. Kao i u prethodnim godinama, postoji nesrazmjer između broja sudija ovog suda i broja sudija i stručnih saradnika u općinskim sudovima. Sa 30.06.2025. godine u Kantonalnom sudu u Tuzli radilo je 25 sudija, uključujući i predsjednicu suda, jer je troje sudija otišlo u penziju do 01.06.2025. godine, jedan sudija je otišao u penziju u mjesecu novembru 2024. godine, dok se dvoje sudija nalazi na dužem bolovanju.

I u 2025. godini u ovom sudu je izražen problem nedostatka administrativno – tehničkog osoblja (daktilografa) koji bi bili u funkciji podrške rada sudijama, jer obim posla koji se povećao radom na CMS-u i konstantno povećava, zahtijeva da svaki sudija ima svog saradnika – daktilografa, a što zahtijeva i dodatna sredstva u budžetu. Posebno naglašavamo, da su sve sudije maksimalno angažovane na svojim referatima, te da u skladu sa donesenim Planom rješavanja predmeta rade stare predmete i dosljedno se pridržavaju tog plana.

Analiza „perioda neaktivnosti” u predmetima:

U ovom izvještajnom periodu u Kantonalnom sudu u Tuzli je na snazi Plan rješavanja predmeta na godišnjem i kvartalnom nivou. U godišnjem Planu rješavanja predmeta nalaze se prvostepeni krivični predmeti, vanparnični predmeti (priznanje inostranih sudskih odluka) i predmeti upravnog spora. Svi ostali predmeti su raspoređeni u rad prema Planu rješavanja predmeta koji se sačinjava na kvartalnom nivou, svaka tri mjeseca i prema tom Planu predmeti se dodjeljuju sudijama u rad prema starosti inicijalnog akta kojim je pokrenut postupak pred općinskim sudom i prema starosti faze kojom je pokrenut postupak pred ovim sudom. Predmeti u sudu su ravnomjerno raspoređeni na sve sudije, tako da su u pogledu ukupnog broja predmeta sudije ravnomjerno opterećene. U nekim prvostepenim krivičnim predmetima zbog raspisanih potjernica protiv optuženih i osumnjičenih lica, predmeti su neaktivni i ne mogu se raditi, tako da su u CMS-u ti predmeti označeni kao nerješivi. Na građanskom referatu i drugostepenom krivičnom referatu, postoji opravdana neaktivnost rada na predmetima, jer sudije objektivno zbog velikog broja zaduženih predmeta i pritvorskih predmeta, ne mogu predmete uzeti u rad, jer 85% mjesečne norme isključivo rade stare predmete, a preostali dio norme od 15% pritvorske predmete, predmete nasilja u porodici, privremene mjere, kao i ostale predmete po zakonu hitne prirode.

U građanskim predmetima, ali u neznatnom broju predmeta, postoji neaktivnost u predmetima, jer su predmeti od strane građanskog vijeća ovog suda, vraćeni prvostepenom sudu na izvidajne radnje prije odlučivanja o žalbi i takvi predmeti su u CMS sistemu označeni kao nerješivi.

Prijedlog mjera kako bi se utvrđeni predvidivi rokovi skraćivali i približavali optimalnim rokovima:

- Potrebno je u Kantonalnom sudu u Tuzli u narednom periodu izvršiti popunjavanje sistematizacije suda sa sudijama koji nedostaju, jer je 3 sudija otišlo u penziju u 2025. godini, dok je 1 sudija otišao u penziju u mjesecu novembru 2024. godine i još uvijek nije popunjena njegova pozicija, a što se značajno odražava na ukupan broj neriješenih predmeta.
- Također je potrebno popuniti pozicije stručnih saradnika koji bi bili u funkciji podrške rada sudija, posebno na krivičnom referatu, gdje su sudije izuzetno opterećene predmetima svih vrsta. U sistematizaciji ovog suda sistematizovano je 6 pozicija stručnih saradnika, a samo je jedna pozicija popunjena, a u toku je prijem još jednog stručnog saradnika, čija je procedura izbora počela u 2024. godini, tako da će dvoje stručnih saradnika biti angažovano kao podrška radu sudijama na krivičnom referatu.
- Potrebno je izvršiti popunjavanje upražnjenih pozicija administrativno – tehničkog osoblja koje je u funkciji podrške rada sudijama, jer je značajan broj zaposlenika ove kategorije u ovoj godini otišao u penziju. Do 30.06.2025. godine sud je popunio upražnjene pozicije 5 viših referenata za operativno – tehničke poslove, te upražnjene pozicije ostalih namještenika koji ne pripadaju administrativno – tehničkom osoblju.
- Visoko sudsko i tužilačko vijeće BiH kada postoji mogućnost u skladu sa zakonom, treba koristiti institut delegacije sudija iz sudova koji su ažurni u sudove koji imaju veliki broj neriješenih predmeta, jer jedan dio kantonalnih sudova nemaju predmeta za rad, a sudije u tim sudovima nisu zainteresovane da budu delegirane na rad u drugi sud. Iz Kantonalnog suda u Tuzli se godinama upućuju sudije na privremeno obavljanje sudijske dužnosti u Kantonalni sud u Odžaku, pa i ove godine i to isključivo iz razloga što je ovaj sud najbliži Kantonalnom sudu u Odžaku, iako to ne bi trebao biti kriterij, jer je poznato da Kantonalni sud u Tuzli ima značajan broj predmeta u radu u odnosu na neke druge kantonalne sudove koji tih predmeta nemaju, a njihove se sudije ne upućuju na privremeno obavljanje sudijske dužnosti u Kantonalni sud u Odžaku.

PREDSJEDNICA SUDA

Indira Hadžimehmedović